



**Datganiad i'r cyfryngau
GWAHERDDIR EI GYHOEDDI TAN 09.30 AWR
DYDD IAU 13 AWST 2020**

Canlyniadau Safon Uwch ac UG fwy neu lai yr un fath yng Nghymru

Canlyniadau TAG Safon Uwch

Mae sefydlogrwydd i'w weld yn y canlyniadau Safon Uwch rhagarweiniol i Gymru gyda 98.6% o'r myfyrwyr yn ennill A* - E. Gwelwyd cynnydd bach ar radd A* gyda 10.8% o'r ymgeiswyr yn casglu'r graddau hyn.

Cyflwynwyd 30,448 o gofrestriadau am arholiadau Safon Uwch yng Nghymru eleni, gostyngiad o 3.3% o gymharu â 2019. Mae hyn yn barhad ar y gostyngiad mewn cofrestriadau Safon Uwch ers haf 2015, ac yn cyfateb i'r gostyngiad ym maint y garfan 18 mlwydd oed.

Yng Nghymru, mae gwrywod yn parhau i berfformio'n well na'r benywod ar radd A*, 0.8 pwynt canrannol ar y blaen. Ar y graddau eraill, mae'r menywod yn parhau i wneud yn well na'r gwrywod. Enillodd 99.0% o'r cofrestriadau pwnc gan fenywod eleni raddau A*-E, o gymharu â 98.2% o'r cofrestriadau gan wrywod.

Canlyniadau Uwch Gyfrannol (UG)

Cyflwynwyd 45,435 o gofrestriadau cyfnewid ar gyfer UG yng Nghymru eleni, sy'n gynydd o 14.6% o gymharu â 39,646 y llynedd a gellir priodoli hyn i raddau i nifer yr ymgeiswyr sy'n cyfnewid.

Eleni yng Nghymru gradd A oedd 22.2% o'r holl raddau a ddyfarnwyd, o gymharu â 20.3% yn 2019. Mae canran yr ymgeiswyr yn ennill graddau A - E yn dangos twf bach, gyda 91.4% yn ennill y graddau hyn.

Gradd A oedd 23.8% o'r holl raddau a enillwyd gan fenywod, graddau A-E oedd 93.4%. Y ffigurau cyfatebol i'r gwrywod oedd 20.0% ar radd A a 88.9% ar raddau A - E.

Tueddiadau yn y Cofrestriadau Pwnc

Ar y cyfan mae gostyngiad wedi bod yng nghofrestriadau'r holl bynciau ar gyfer Safon Uwch. Ond, gwelwyd cynnydd yng nghofrestriadau pynciau Bioleg (+44), Cyfrifiaduro (+37), Mathemateg Bellach (+55), Mathemateg (+119) Ffiseg (+48), Seicoleg (+128) a Cymdeithaseg (+22).

Mae patrwm cofrestru ar i fyny wedi bod yn y rhan fwyaf o bynciau ar gyfer yr UG, a chafwyd cofrestriadau sylweddol ar gyfer y canlynol: Bioleg (+941), Cemeg (+654), Llenyddiaeth Saesneg (+539), Mathemateg (+517), Ffiseg (+476) a Seicoleg (+673).

Mathemateg yw'r pwnc Safon Uwch ac UG mwyaf poblogaidd o hyd gyda 3,704 a 5,144 o gofrestriadau yn ôl eu trefn. Parhau'n gymharol sefydlog wnaeth y canlyniadau ar y naill lefel a'r llall.

Mae cynnydd bach wedi bod yng nghofrestriadau pynciau Cymraeg Iaith a Cymraeg Ail Iaith ar gyfer UG, ond gostyngiad ar gyfer Safon Uwch. Ond, mae hyn yn adlewyrchiad o'r amrywiadau flwyddyn ar ôl blwyddyn yn y cofrestriadau.

GWYBODAETH BELLACH

Am wybodaeth am y canlyniadau yng Nghymru, cysylltwch â:

Jonathan Thomas, Rheolwr Cysylltiadau Cyhoeddus, CBAC ar 029 2026 5102
jonathan.thomas@cbac.co.uk.

Am wybodaeth am y canlyniadau yn y DU, cysylltwch â swyddfa'r wasg y CGC ar 020 7227 0671, neu 07905 683816 neu pressoffice@icq.org.uk

Mae manylion ystadegol pellach am ganlyniadau'r DU, Cymru, Lloegr a Gogledd Iwerddon i'w cael yn www.icq.org.uk

NODIADAU I OLYGYDDION

Cyffredinol

Cyhoeddir tablau manwl ar wahân o'r canlyniadau TAG UG a Safon Uwch, TAG UG a Safon Uwch Cymhwysol. Mae'r rhain hefyd wedi'u GWAHARDD RHAG CAEL EU CYHOEDDI tan 09.30 Dydd Iau 13 Awst 2020 a byddant ar gael ar wefan CBAC o 09.30 ar 13 Awst 2020 – www.cbac.co.uk

Darperir y canlyniadau gan y Cyd-gyngor Cymwysterau (JCQ^{CIC}), sy'n cynrychioli'r cyrff dyfarnu yn y DU. CBAC sy'n eu cyflwyno yng Nghymru, ar ran y CGC. CBAC yn unig sy'n dyfarnu canlyniadau Cymhwyster Bagloriaeth Cymru.

Mae'r CGC (JCQ^{CIC}) yn cynnwys y cyrff canlynol: AQA, CBAC, CCEA, City & Guilds, OCR, Pearson a SQA – y saith darparwr cymwysterau mwyaf yn y DU.

Mae'r data a ddarperir ym mhrif gorff y datganiad hwn i'r cyfryngau'n cynrychioli gwybodaeth gyfansawdd i Gymru ar draws yr holl gyrff dyfarnu ac yn hyn o beth felly, data rhagarweiniol ydynt, yn yr ystyr eu bod yn dangos y sefyllfa ar adeg cyhoeddi'r canlyniadau.

Mae'r fframwaith cymwysterau yn gyffredin ar draws Cymru, Lloegr a Gogledd Iwerddon. Darperir data cynhwysfawr cofrestriadau a chanlyniadau fesul gwlad gan y Cyd-gyngor Cymwysterau (JCQ) – www.jcq.org.uk – a byddant ar gael o 09.30 fore dydd Iau 13 Awst 2020.

Ofqual (Lloegr), Cymwysterau Cymru a CCEA (Gogledd Iwerddon) sy'n rheoleiddio'r cyrff dyfarnu. Bydd yr awdurdodau rheoleiddio yn monitro safonau'r sefydliadau dyfarnu. Mae cynnal safonau o fewn ac ar draws yr holl gymwysterau yn hanfodol bwysig i'r holl gyrff dyfarnu er mwyn sicrhau ymdriniaeth deg â'r holl ymgeiswyr.

Dylid ystyried, wrth fynd ati i gymharu canlyniadau ysgolion a cholegau unigol ag unrhyw gyfansymiau cyfansawdd, bod amrywiadau sylweddol i'w disgwyl. Mae nifer o ffactorau cymdeithasol, economaidd ac addysgol yn effeithio ar berfformiad disgyblion mewn arholiadau, un yn unig o'r rhain yw effeithiolrwydd yr ysgol neu'r coleg ei hun.

TAG Uwch Gyfrannol a Safon Uwch

Yng Nghymru, mae dwy ran i'r arholiad Safon Uwch, yr Uwch Gyfrannol (UG) a'r U2. Mae'r UG a'r U2 gyda'i gilydd mewn un pwnc yn ffurfio'r Safon Uwch.

Y safon a osodir i'r UG yw'r hyn a ddisgwylir ar ddiwedd blwyddyn gyntaf cwrs dwy flynedd. Mae'r UG yn ymdrin â'r deunydd llai anodd mewn cwrs Safon Uwch. Nid yw'r UG, felly, o'r un safon â'r Safon Uwch lawn. Mewn cymwysterau diwygiedig a gymeradwywyd gan Cymwysterau Cymru, mae'r UG yn cyfrannu 40% at y Safon Uwch lawn. Yn y manylebau blaenorol, roedd yn cyfrannu 50%.

Yn ystod ail flwyddyn y cwrs bydd y myfyrwyr yn dod i ddeall yn well y pynciau maent yn eu hastudio, ac mae'r U2 yn ymdrin â'r deunydd anoddach yn y fanyleb.

Trosglwyddwyd safonau'r dyfarniadau UG a Safon Uwch yn y cymwysterau diwygiedig o fanylebau blaenorol. Defnyddir y dull "canlyniadau cymaradwy" a gymeradwywyd gan y rheoleiddwyr.

Proses Safoni

Gofynnodd y llywodraeth i'r rheoleiddwyr ddatblygu mecanwaith i'w ddefnyddio i ddyfarnu graddau eleni yn absenoldeb arholiadau yn seiliedig ar y canlynol:

- gallu pob myfyriwr yn y pwnc, yn seiliedig ar asesiad canolfan arholiadau, wedi'i ategu gan amrywiaeth o dystiolaeth; a
- sicrhau y cynhelir safonau'r cymhwyster a bod dosraniad y graddau'n dilyn proffil tebyg i flynyddoedd blaenorol.

Eleni, mae'r byrddau arholi a'r CGC wedi gweithio i gyflwyno canlyniadau mewn ffordd sydd mor deg â phosibl gan ystyried yr amgylchiadau, gan ddefnyddio'r dull safoni a ddatblygwyd gan y rheoleiddwyr. Cyhoeddodd y rheoleiddwyr wybodaeth am eu model safoni a seiliwyd ar dair ffynhonnell allweddol o wybodaeth:

- Graddau Asesu Canolfannau (GAC) a threfnau rhestrol myfyrwyr a gofrestrwyd ym mhob pwnc, gan adlewyrchu eu cyflawniadau a'u gwaith dros y ddwy flynedd flaenorol;
- cofnod hanesyddol o'r ganolfan; a
- chyflawniad blaenorol y garfan o fyfyrwyr ar gyfer pob pwnc.

Mae'r byrddau arholi wedi gweithio'n galed i ddatblygu systemau cwbl newydd, er mwyn gallu casglu GAC a threfnau rhestrol oddi wrth y canolfannau arholiadau. Yna, roedd angen gwirio'r rhain yn drylwyr cyn eu gosod yn y model(au) ystadegol. Hefyd datblygwyd systemau newydd i'w defnyddio i sicrhau ansawdd i gefnogi uniondeb y canlyniadau.